

## **Dithero tsa Tirelano mo Kutlwanong**

18/2015 Thero ka Sontaga e e bidiwang Letare, e le ka 15. 03. 2015

### **Mo leineng la Modimo o e leng Rara le Morwa le Mowa o o Boitshepo!**

Lefoko le le okamelang beke eno, le kwadilwe mo go Joh. 12:24, le re: **"Ammaaruri, ammaaruri ke lo raya ke re: Fa tlhaka e sa wele mo mmung ya swa, e tla nna e le yosi; mme fa e swa, e ungwa leungo le legolo."**

1. Sefela sa 226 - 212/220

**2. Thapelo:** Modimo Mong-wa-thata-yotlhe, Rra rona yo kwa legodimong, mapelotlhomogi a gago a tsoga a le mašwa mosong mongwe le mongwe, le fa re se na tshwanelo epe o re naya molemo otlhe o o re tlhokang mo mmeleng le mo moweng. O re neele Mowa o o Boitshepo wa gago gore re amogele molemo otlhe wa gago ka dipelo tse di tletseng ka tebogo le boitumelo, e bile re go direla ka go utlwa, re kopa jalo mo leineng la Morena Jesu Keresete, yo o busang, a tshela mmogo le wena le Mowa o o Boitshepo ka bosakhutleng. Amen.

3. Lefoko la Testamente e kgologolo le kwadilwe mo go Jesya 54:7-10;

Epistolo ka fa thulaganyong ya 2 e kwadilwe mo go 2 Bakorinthe 1:3-7;

Efangele ka fa thulaganyong ya 3 e kwadilwe mo go Johane 6:55-65.

4. A go ipolelwe tumelo ya bokeresete!

5. Sefela sa 229 - 215/223

6. Thapelo ya mmadi wa thero.

**7. Efangele** ka fa thulaganyong ya 1 e kwadilwe mo go Johane 12:20-26, e re: "Ga bo go le Bagerika bangwe mo go bone ba ba neng ba tlile go obamela mo moletlong. Bao ba tla go Filipo wa Betsaitsa wa Galelea, ba mo kopa ba re: 'Morena, re batla go bona Jesu.' Filipo a ya a bolelela Andrea, mme Andrea le Filipo ba ya ba bolelela Jesu. Jesu a ba araba a re: 'Nako e tsile ya gore Morwa-Motho a galalediwe. Ammaaruri, ammaaruri ke lo raya ke re: Fa tlhaka ya mabele e sa wele mo mmung ya

swa, e tla nna e le yosi; mme fa e swa, e ungwa leungo le legolo. Yo o ratang botshelo jwa gagwe o bo isa tatlhegong, mme yo o tlhoileng botshelo jwa gagwe mo lefatsheng leno o tla bo bolokela botshelo jo bo se nang bokhutlo. Fa motho a ntirela, a a ntshale morago, mme kwa ke leng teng, modiredi wa me le ene o tla nna teng. Fa motho a ntirela, Rara o tla mo tlotla." Amen.

**8. Thero:** Barategi mo Moreneng, Jesu Keresete o tsile mo lefatsheng go senolola kgalalelo ya ga Rara yo o kwa legodimong. E le kgalalelo e e tletseng bopelotlhomogi le boammaaruri. Mme ba bantsi ga ba e bona, ga ba e tlhaloganya. Ka nako ya ga Jesaya Modimo o setse o buile ka ga motlhanka wa gagwe e bile Jesu Keresete gore "ga go lekane, fa o le motlhanka wa me go tsosa ditso tsa ga Jakobe le go busa ba ba bolokilweng ba Iseraele; le gona ke go dirile lesedi la baheitane gore o nne pholoso ya me go fitlha kwa bokhutlong jwa lefatshe." Jes. 49:6 Ee, re boleletswe gore baheitane ba tla atamela kwa Jerusalema go obamela Modimo. Gongwe borre bao ba Bagerika ba ba kopang thuso mo go Filipo gore ba kopane le Jesu, ba utwile tse dintsi ka ga Jesu, gongwe ka ditiro tse di kgakgamatsang tsa gagwe, fa a thusitse balwetse gongwe fa a tsosile Lasaro mo losong. Gongwe ba mmonye, fa a tsena mo Jerusalema ka esele. Gongwe ba utwile lentswe la batho ba ba kuang: Hosiana kwa godimo go bakwe yo o tlang mo leineng la Morena. O ka re ka nako eo, e bile mo malatsing ao fa pele ga paseka, batho ba bantsi ba gaketse thata go kopana le Jesu.

Mme mo tshimologong ya kgaolo ya bo12, re utlwa, fa Maria a tloditse Jesu dinao – re utlwa ka tlhaloso ya ga Jesu, gore ba lese Maria, gonne o ne a se boloketse letsatsi la phitlo ya gagwe. Re utlwa ka maano a go bolaya Lasaro. Ka dilo tseo re utlwa ka kotsi e e gaufi, mme ba bantsi, o ka re ka nako eo le barutwa ba ga Jesu ba ne be ise ba tlhaloganye sentle se se tla dirafalang. Ba bantsi ba bona tlotlo le palo ba batho ba ba phuthegileng, gongwe ba ela modumo tlhoko wa batho ba ba neng ba amogela Jesu mo Jerusalema. Mme dilo tsotlhe tseo ga di fapose ene mo tseleng ya gagwe go baakanya pholoso le botshelo jo bo sa khutleng. Nako e ne e tsile ka nako eo, e seng go phuta ditsala le ba ba mo salang morago, nyaa, nako e ne e tsile gore Morwa-Motho a galalediwe. Mme re a tlhaloganya gore Jesu o ne a bua ka kgalalelo e ntseng jang. Jaaka Moše o ne a pega noga mo nageng, Jesu o galaleditswe mo sefapaanong. Mo Gologotha ba bantsi a ka re ba ne ba mo sotla – ba re, o thusitse ba bangwe, ke

eng, fa o sa ithuse, ba sa tlhaloganya gore bogolo ke yone thuso ya gagwe go ineela mo losong, gore a swe boemong jwa rona batho ba ba senang tshwanelo.

Jesu o ne a dirisa sekao sa peo. Le yone fa e sa wele mo mmung e bile e swa, ga e ungwe maungo, mme e sale e le yosi. Maungo a loso lwa ga Jesu ke boitshwarelo jwa dibe le botshelo – botlhe ba ba dumelang mo go ene ba a tshela. Kgalelo ya ga Jesu ga e bonale sentle ka matlho a rona fela ka letsatsi leo la labotlhano. Mme ka letsatsi la tsogo ya gagwe, ya senolelwa sentle mo go botlhe ba ba dumelang. Ka letsatsi la bofelo, fa Jesu a tsosa baswi botlhe, kgalelo e tla bonala mo go botlhe, e bong mo go ba ba dumelang le ba ba sa dumeleng.

Jesu Keresete o re rutile sentle ka fa thulaganyong ya Modimo gore fa o ineela mo diatleng tsa Modimo, ga o leke go tshwara, le e seng go boloka botshelo ka thata ya gago, o amogela botshelo jo o bo baakanyeditsweng ke Modimo ka Morwaaona. Mme fa o leka go ipoloka le go itshelela, o mo kotsing ya go latlhegelwa ke jone. Jesu a re: Fa motho a ntirela, a a ntshale morago, mme kwa ke leng teng, modiredi wa me le ene o tla nna teng. Fa motho a ntirela Rara o tla mo tlotla.” Jesu Keresete ke sekao se se siameng mo botshelong jwa rona, re ka ithuta sentle mo go ene go direla ba bangwe le go tshela ba bangwe. O dirile jalo ka ntlha ya lorato lo logolo lwa gagwe, ee, a le rona re se ka re leka go direla ba bangwe kwa ntle ka lorato. Gonne Moapostolo Paulo o re kgothatsa ka gore: “le fa nka bo ke abela bahumanegi di-tsa-me tsotlhe, kampo ke neela mmele wa me gore ke fisiwe, mme ke se na lorato, go ka bo go sa nthuse sepe.” 1 Bakor 13:3 Tirelo ka boyone ga e thuse, jaaka re dumela gore ga re pholosiwe ka ditiro tsa rona, mme ka ntlha ya tiro ya ga Jesu Keresete. Tirelo le ditiro tsotlhe ke maungo fela a a ungwiswang ka peo e e swang ka tshegofatso ya Modimo. Mme peo e tshwanetse go wela mo mmung e be e swa e ise e ungwe.

Re itse sesupo se sengwe sa go swa le go tsosiwa – ke se kolobetso e se kayang, fa motho yo mogologolo yo o mo go rona o tshwanetse go swa ka boikwatlhao le tlhabologo, motho yo mošwa o sena go tsosiwa mo kolobetsong ka thata ya Modimo, motho yo mošwa yo o kgatlang Modimo. Seo se tshwanetse go diragala letsatsi le letsatsi. Mme re tlhoka thuso ya Modimo le phemelo ya gagwe gore dilo tse dintsi mo botshelong tse di phatsimang tse di kgatlang motho, di se ka di re faposa mo tseleng e e siameng. Thuso e teng, gonne Jesu o rulagantse thulaganyo sentle gore ka ditiro

tša gagwe tša sakamente le ka tiro ya go rera le go ruta lefoko la gagwe tumelo ya rona e nne e tiisiwe, re thusiwa ke baphuthegi le badumedi ba ba re thusang ka kgakololo le puisano ya kutlwano ka lefoko la Modimo. Re tlhokomeletswe sentle ke Modimo, a re se ka ra boifa, ka re belegwa mo diatleng tša gagwe, re se ka re leka go ipolokela botshelo mme re baya sengwe le sengwe mo diatleng tša ona ka tumelo gore "re itse gore bone ba ba ratang Modimo, dilo tsotlhe di dira mmogo go ba tsalela molemo" Rom 8:28

"Itumeleng le Jerusalema, lo mo dudueletse, lotlhe ba lo mo ratang! Itumeleng nae ka pelo yotlhe, lotlhe ba lo neng lo mo hutsafalela! Gore lo tle lo anye, lo kgore mo mabeleng a dikgomotso tša gagwe; gore lo tle lo nwe, lo lapologe ka letlotlo la kgalalelo ya gagwe! Gonne Morena o bua jaana a re: 'Bonang ke tla eledisetsa kagiso kwa go ene jaaka noka le mahumo a ditshaba jaaka nokana e e tletseng,'" Jes. 66:10-12a (Introitus ya Letsatsi). Amen.

**9. Thapelo:** Morena Modimo o re thuse ka gale go go direla le go go sala morago, gore re bone boswa jwa rona mo legodimong le tlotlo mo go Rra rona yo kwa legodimong. O re utlwe ka ntlha ya ga Keresete. Amen. Thapelo ya Morena: Rara wa rona yo o mo legodimong ...

10. Sefela sa 10 - 10/11

A kagiso ya Modimo e e fetang tlhaloganyo yotlhe e boloke dipelo tša rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke C.D.Weber, ka ngwaga wa 2008

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.